

照所請該部知道欽此

兩廣總督岑奏官軍攻剿達字營叛勇獲勝請獎片

再調補湖南布政使劉春霖所部達字營勇奉 旨回滇遣撤上年十月行至貴州省巴沙地方後營口全營同時叛變臣聞信後卽慮其回竄粵境當飭統帶棠軍知縣陳兆棠馳往扼堵陳兆棠時在柳城協攻弄匪接電立卽拔隊星夜前進聞叛勇五六百人到融縣屬苗山十一月二十五夜我軍甫抵崖脚卽與匪遇分路迎戰匪占地勢多用快槍圍攻竟夕未能得手次日黎明鼓勇進攻哨弁尹懷清身受槍傷仍復裹創銳進各軍士益加奮勇連斃悍匪數十名匪勢少卻退踞竹峒又退龍甲山登高死守時我軍已血戰一夜雪地霜天未得一飽猶跟蹤血薄斃匪甚多至夜匪勢不支復冒死向寨撈村而逃寨撈村後倚元寶山壁立千仞前排石壁儼如石門道路紆回匪得憑險自固適署融縣知縣趙邦澤亦督同團勇馳至會合圍攻二十八日棠軍挑取精銳直逼石門另撥一隊由村旁攻入兩路夾擊斃匪約百餘名生擒二十一名正法該匪自知窮蹙縱火焚村竄出村後元寶山棠軍左營管帶顏鳳鳴先派隊伍將該山圍困親兵哨弁廖文貴率隊直上中槍陣亡各勇憤激攀藤附葛上逼層崖戰至二更生擒十一名陣斬數十級其墜崖傷死者不可勝計知縣趙邦澤督

團圍住山後用土礮轟擊亦斃多匪餘匪乘夜緣崖逃潰嗣於馬平之弄竹木吉等村爲提督丁槐全數殲滅當叛勇初入粵境聲勢洶洶人心震動陳兆棠率遠來疲乏之師當兇醜方張之寇鏖戰四晝夜斃匪數百人奪獲快槍土槍共五十餘枝雖叛弁倖逃而全股已斬擒過半卒之王崑山等依附土寇窮蹙無歸一鼓殲除不致蔓延滋患陳兆棠崖脚一戰其功實不可沒所有在事異常出力之統領棠軍直隸州用四品銜補用知縣陳兆棠擬請免補知縣以直隸州知州仍留原省補用管帶□字左營花翎補用游擊顏鳳鳴擬請免補游擊以參將儘先補用並加副將銜分省試用從九品羅葆德擬請免補從九品以縣丞仍分省歸候補班補用合無仰懇 天恩俯准如請給獎並請將陣亡哨弁五品軍功廖文貴勅部照例議卹以昭激勸謹 奏奉 硃批著照所請該部知道欽此

駐藏辦事大臣有密咨駐藏幫辦大臣鳳不便收回三瞻文

竊照本大臣於光緒三十年十二月十四日准川督部堂密咨准軍機大臣寄奉 上諭有人奏西藏情形危急請經營四川各土司並及時將三瞻收回內屬等語著錫有鳳體察情形妥籌具奏原摺著抄給閱看將此各諭令知之欽此遵 旨寄信前來自應遵 旨籌辦若由川遽定收回之議誠恐於藏中隔閼況藏約尙未大定賴默察事勢以定事之行止時